

Grupo di Betico cu produccion nobo

Den cuadro di celebracion di 30 aña di Himno y Bandera y 20 aña di Status Aparte



ORANJESTAD (AAN): Grupo di Betico ta un agrupacion musical familiar cu raiznan musical y cultural profundo Arubano. E herencia musical di famia Croes ta uno cu a worde pasa di generacion pa generacion. Desde comienzo di siglo 20, den e hogar di famianan Croes na Santa Cruz, musica tabata un forma di expresion

y entretenimiento.

Na cas di Francisco "Panchico" Croes y Maria Luisa "Mimita" Croes Lopez, for di chiquito e yiunan por a aprecia y admira e dushi musica tipico Arubano cu tabata ser treci pa familiarnan musico manera entre otro Mo Tito y su Conhunto Folclorico Arubano. Den cas semper

tabata reina e ambiente musical y por lo tanto cada un di e yiunan di Don Panchico y Mimita a lanta ta canta of toca un of otro instrumento musical.

Na aña 1959 momento cu nan yiu Betico a regresa Aruba despues di a termina su estudionan na Hulanda, el a motiva su rumannan pa rebiba y continua cu e tradicional paranda familiar di fin di aña. Despues di misa di Pasco mainta su paranda tabata pasa di famia pa famia. Betico tocando su sinfonia di man mientras cu e otro rumannan tabata canta of toca un instrumento.

E famia den su totalidad tabata participa na e parandanan di tur fin di aña, principalmente e Dande di tur aña nobo, bishitando famia y amigonan cu e alegre saludo musical.

Na aña 1968, na yegada di e rumannan Rudy y despues

Tommy cu tabata studia na Hulanda, a dicidi di formalisa e grupo formando asina e agrupacion tipico parandero cu despues a worde bon conoci como Betico Y Su Grupo. E grupo tabata forma pa rumannan Betico, Rudy, Aiky, Tommy, Efrain, Hendrik y Adison, mientras cu e rumannan muher Ada, Chichia, Mary, Didi hunto cu nan famia, tanta, omonan y demas famia, tur tabata participa cantando of tocando un instrumento.

Betico tabata percura pa e paranda di Dande tur aña pasa den cada skina di nos isla bishitando famia, amigo y conocirnan. Betico y su grupo a participa na tur festival di Dande desde su inicio den e decada di añanan 70, cu excepcion di algun biaha pa motibo di luto e grupo no por tabata presente. Betico tabata tin un amor grandi pa e folclore y cultura di su isla y

tabata entrega tur su esfuerso pa promove e musica tipico Arubano.

Mientrastanto, entre e subrinonan tabata tin un chiquitin inquieto cu a hereda e talento musical familiar aki y tabata muestra hopi interes den musica. Hildward, yiu di Ada y Maiky, tabata toca sinfonia di man banda di su omo Betico den e grupo. Esaki a resulta den un influencia musical grandi p'e y asina a bira e prome di e famia cu a tuma e paso di continua su estudio avansa den e ramo di musica profesional.

Na aña 1986, despues di e fayecimento di Betico, e grupo a dicidi di continua cu e tradicion familiar aki na su honor. Betico na mas cu un ocasion a expresa e deseo ferviente di mira nos folclore y cultura sigui florece y cu generacionnan di futuro por

Sigui lesa Pg. 39

Continuacion pagina 38

keda apreci'e y conserv'e. Na e momento ey e grupo a tuma e decision di cambia e nomber pa Grupo Di Betico.

Na aña 1990, Hildward a compone e cancion Paranda Arubiano pa e grupo por a participa cu n'e den e festival di Dande como propio composicion. Asina na aña 1991 e grupo a gana e premio di mihor composicion original den e festival anual di Dande y musica tipico.

E siguiente aña e Grupo Di Betico a cuminsa graba su propio composicionnan y nan tabata resona na radio emisoranan. Aki e estilo y zonido original di e grupo a keda formalmente concretisa. Un estilo parandero navideño alegre, caracteriza pa e instrumentonnan tipico-acustico y e coro di voznan baronil. E publico inmediatamente a abraza e estilo unico y e musica contagioso di e grupo y pedida pa presentacionnan publico y fiestanen priva tabata drenta na grandi. Sinembargo e meta original pa cual e grupo a worde funda, esta e tradicion di bishita famia cu e saludo musical di fin di aña, nunca a worde lubida of laga un banda. E grupo semper a percura pa mantene e tradicion familiar aki bibo.

Ariba multiple peticion di su fanaticonan, Grupo Di Betico a realiza nan prome disco compacto titula "Paranda Arubiano" na aña 1995. E exito di e prome produccion aki tabata abromador y e cantidad di venta a sobrepasa 10.000 exemplar. Canticanan manera Paranda Arubiano, Ban Celebr'e Y Feste'h'e, Añ' Nobe Awe, y Arubiano n'a n'a, instantaneamente a bira

clasiconan navideño.

E grupo a ricibi na diferente ocasion galardonnan pa mihor grupo tipico di fin di aña. E principal cantante di Dande di e grupo, Sr. Maiky Croes, kende a hereda su estilo di Dande original for di su tata Joonehi, cu ta e prome persona cu a graba un Dande cu su ruman Mo Tito y su Conhunto Folclorico Arubano, a pasa e herencia aki na su yiu Maikito cu a bira Rey Di Dande cu Grupo Di Betico na aña 1998, 2002 y 2005.

Na aña 1999, Grupo Di Betico a lansa su di dos produccion musical ariba disco compacto titula: "Tradicion". Un bes mas e exito di e grupo tabata inmenso. Un Siglo Nobo, Mi Conono, Mosaico Di Aguinaldo, y Mosaico Arubiano ta algun di e clasiconan di e di dos produccion di Grupo Di Betico.

Na aña 2002 un bes mas Grupo Di Betico a pone un joya di disco compacto ariba mercado. E produccion aki titula "Alegria" a mantene e mesun formula exitoso di e grupo: e ritmo contagioso, e melodía y harmonía inigualable, e alegria, y e voznan unico di Grupo Di Betico. Canticanan manera Alegria, Dugudushi, y Te Ora Solo Sali, a sa di cosecha e exito grandi cu e grupo a conoce den su trayectoria discografico. Ariba e disco compacto aki tambe ta aparece e Dande canta pa Rey Di Dande di aña 2001 acompaña pa Grupo Di Betico, Sr. Eric Ras.

Na aña 2006 Grupo Di Betico ta trece e produccion "Libertad!" conmemorando e celebracion di 30 aña di himno y bandera y 20 aña di Status Aparte. E produccion

aki ta un dedicacion di Grupo Di Betico na nan immortal fundador, libertador y tata di pais Aruba. Betico, arquitecto, constructor y realizador di e Status Aparte di Aruba. E disco compacto "Libertad!" ta presenta composicionnan den e diferente ritmo y generonan tipico Arubano. Gos Oduber, bajista di e grupo, ta compositor di mayoria di a canticanan cu ta aparece ariba e produccion aki.

Den anticipacion pa nan proximo CD cu ta programa pa sali na fin di aña 2006, Grupo Di Betico a lansa dos cantica promocional exitoso cu ta Fiesta Den Famia (2005) y Le La La Wo (2004).

E herencia familiar cu a cuminsa na Santa Cruz generacionnan atras den famia Croes ta continua cu pasonan firme, mirando cu ya caba varios di e yunan hobencito den famia ta cantando y tocando diferente instrumento.

Actualmente Grupo Di Betico ta consisti di e rumannan Tommy (cuarta y canto), Rudy (percusion y canto), y Aiky (percusion y canto), Leoncio (guitar y canto), Hildward (sonfonia di man y canto), Maikito (percusion y canto), y Maiky Croes (percusion y canto), Rodney Lopez (percusion y canto), Gos (guitar bajo y canto), Dennis (percusion y canto), y Rigo Oduber (guitar y canto), y Ruben Werleman (cuarta y canto). Grupo Di Betico ta ser considera como patrimonio cultural nacional Arubano y esey ta keda comproba mediante e cariño y aprecio cu e pueblo di Aruba semper ta demostra pa e grupo musical procedente di un famia humilde di Santa Cruz.